

INUIT ATAQATIGIIT INATSISARTUNI



9. Juni 2022

Inatsisartut Suleriaasianni § 37 imm. 1 naapertorlugu apeqqutit uku Naalakkersuisunut saqqummiuppakka.

Naalakkersuisunut apeqqutit:

1. Savanut neriukkaatissat akitsunerujussuanngornerini Naalakkersuisut savaatilinnut immikkut ittumik ikiorsiiniarnerlutik?

A) taamaasimappat qanoq, qaqugulu ikiorsiiniarpat?

B) taamaasimangippat suna pissutigalugu ikiorsiianiנגillat?

2. Narsaatinut naggorissaatit akisunerujussuanngornerini Naalakkersuisut savaatilinnut immikkut ittumik ikiorsiinnissamik pilersaaruteqarnerlutik?

A) Ikiorsiiniarsimagunik qanoq, qaqugulu ikiorsiiniarpat?

B) Ikiorsiiniarnissamik pilersaaruteqarsimangippata suna pillugu ikiorsiianiנגillat?

(Inatsisartunut Ilaasortaq Mariane Paviasen, Inuit Ataqatigiit)

Tunggavilersuut: Savaateqarnermik ingerlatsineq unaminartorsiorpoq, savanut nerukkaatissat 50%-tikillugu akitsorsimasut, narsartinullu naggorissaatit 100% qaangerlugu akitsorsimasut oqaatigineqarpoq, taamatuma kingunerisaanik savaatillit ilaatigut nerukkaatissanik, naggorissaatissanillu naammattunik pisiniarsinnaajunnaarput, ukiornissaanullu ernumanartumik inisisimalersimallutik, ukiornissaanut savat naammattumik nerisassaqartinneqarsinnaangillat iliuuseqartoqanngippat. Neriukkaatissat, narsaatinullu naggorissaatit ukiut ingerlanerini akitsoraluttuinnarsimapput, ukiorlu manna akitsungaatsiarujussuarsimallutik savaateqarneq imminut

INUIT ATAQATIGIIT INATSISARTUNI



akilersinnaajunnaaraluttuinnarluni unamminarsigaluttuinnarluni ingerlavoq. Savaateqarnerlu ingerlaannassappat maannangaaq pisariaqavissumik immikkut ittumik ikiorsiinernik pisariaqartitsisoqarpoq, tamannalu nerukkaatissat, naggorissaatinullu tapiissutinik/ikiorsiissutinik immikkut ittumik iliuuseqartoqartariaqarluni tamaaliortoqangippammi savaateqarneq imminut akilersinnaangilluinnartumik aammalu savat ukiornissaannut naammattunik nerisassaqartinneqarsinnaanerat qulakkeerinnittoqarsinnaangimmat, taamaammat paaserusunnarpoq Naalakkersuisut imminut pilersornerulernissatsinnik siunertaqarluta ingerlaniarnermi nunatta iluani neqissaqartitsiniarlutik pilersueqataanerpaannut ilaasunut pijujuartitsiniutaasinnaasunik iliuuseqarniarnersut. Piffissamimi qanittumi iliuuseqartoqangippat savaateqarnerup ingerlaqqissinnaajunnarfissaata tungaanut ingerlasoqarnera allaat oqaatigineqarmat. Ernumatitsinerlu ingerlaannassangippat paaserusunnarpoq Naalakkersuisut qanoq piaartigisumik suliniuteqarsinnaanersut tapiissutitigut imaluunniit ikiorsiissutitsigut. Coronap nalaanni suliffeqarfinnut ikiorsiissutinik immikkut ittunik pilersitsigasuartoqartartoq takuarput maannalu savaatilinnik ikiorsiissutinik pigasuartumik pisariaqartitsisoqarnerani kingoqqutsinngitsumik iliuuseqartoqarniarnersoq paaserusunnarmat.

Ullut qulit qaangiutsinnagit akineqarnissara piumasaraara.